

不思議光菩薩所說經一卷

大乘單譯經

不思議光菩薩所說經一卷

姚秦三藏鳩摩羅什譯

不思議光菩薩所說經

如是我聞。一時佛在舍衛國只陀林中給孤窮精舍。與大比丘僧千二百五十人俱。菩薩摩訶薩五百人。眾所知識。爾時世尊。依舍衛大城。時王大臣婆羅門居士。及諸眷屬。供養恭敬尊重讚嘆。多諸供養衣服飲食卧具醫藥。是如來應供正遍覺明行足善逝世間解無上士調御丈夫天人師佛世尊。生處成就。種性成就。三昧具足。智慧具足。解脫具足。解脫知見具足。具足十力四無所畏佛十八不共法。演說正法初中後善文義美妙。具足清白梵行鮮淨五眼具足。所謂肉眼天眼慧眼佛眼法眼。善知此世他世所住。

于時世尊。善降外道尼乾陀若提子等。佛法熾盛人天宗敬。世尊時到著衣持鉢。及比丘僧眷屬圍繞。趣入舍衛大城乞食。去來進止威儀庠序。視瞻容豫屈伸俯仰。執持衣鉢皆悉庠序。金色妙身光明照曜。猶猛火聚寶珠日月照曜闇夜。三十二相莊嚴其身。以金色足蹈門闌上。當于是時舍衛大城。示現種種未曾有事。如偈所說。

人仙來入時	釋師子蹈闌
現多希有事	淨心聽我說
盲者得目視	聾者得聞聽
裸者得衣服	狂亂得正意
皆歡喜合掌	觀佛無厭足
眾鼓自然鳴	簫笛自出聲
雁鵠鳩鴛鴦	俱出妙軟音
失財得寶藏	眾寶物出聲
時地六種動	不信得淨心
勝覺下轉足	淨蓮花承接
觸眾生安樂	命終得生天
女人妊娠苦	安樂生妙子
無貪嗔痴惱	父母子俱爾
階陛妙莊嚴	多億天雨花
眾生無病患	脫一切眾苦
善逝入城時	一切受安樂

各谓我奉食 各谓佛看我
人仙福德力 非我说能尽

尔时世尊。于舍卫大城。次第乞食至于中路。有一空处捐弃婴儿。容貌端严极为鲜白自[口 束]右指。而此空处多狐狼狗。见是婴儿舐已而去无能逼恼。此婴儿者是福德人久种善根。多人住观生希有心。往来观看空处弃儿。端严可爱欢喜乐见于是婴儿。尔时世尊。见多人众往来空处。知而故问。告阿难言。汝可往彼看。是诸人往来空处。何所作为。阿难白言。如是世尊。大德阿难即往空处。见是婴儿容貌端严自嗽右指。谛视众人其目不瞬。阿难见已便还佛所如见而说。世尊。此空闲处有弃婴儿。容貌端严甚可敬爱犹如宝像。观视诸人其目不瞬。于时世尊。于彼婴儿起悲愍心。观本善根知己成熟。堪能知我所说的法义。又知众生善根成熟。即往婴儿所。到已于一面住。向此婴儿。而说偈言。

本所造恶业 今此报应现
弃捐此空处 婴儿苦如是
尔时婴儿。承佛神力。自本善力以偈报佛。

瞿昙犹故有 见弃空处想
尊在道场时 不知是想耶
尔时世尊。复以偈答。

我已知于想 而我永无想
以怜愍汝故 来至此空处
尔时婴儿。复说偈言。

若不得众生 毕竟不可得
尊怜愍于谁 谁所转悲心
尔时世尊。复说偈言。

众生不知是 无我空寂灭
为觉悟彼故 我行村城邑
尔时婴儿。复说偈言。

达解空寂灭 觉了空寂灭
犹有众生想 如来不断耶
尔时世尊。复说偈言。

佛悲力如是 觉了空寂已
教化众生故 导师演说法
尔时婴儿。复说偈言。

犹故有颠倒 如来未断耶

无众生生想 如是生悲耶
尔时世尊。复说偈言。
佛之所护持 菩萨生精进
为不达众生 人尊发庄严
尔时婴儿。复说偈言。
此是痴庄严 若不得于物
若法非是物 何由起庄严
尔时世尊。复说偈言。
此大悲神力 调御世如是
犹不着于物 为众生说法
尔时婴儿。复说偈言。
法无有文字 云何可演说
世间大败失 非法作法说
尔时世尊。复说偈言。
我不败坏世 我不非法说
众生自倒惑 我解脱彼结
尔时婴儿。复说偈言。
结使无根本 亦无有方所
又不在内外 于何脱彼结
尔时世尊。复说偈言。
从于妄想生 与颠倒共俱
为断彼妄想 婴儿我说法
尔时婴儿。复说偈言。
心性自常净 彼中无垢结
正使多妄想 性净不生垢
尔时世尊。复说偈言。
如是如汝说 心性自常净
客烦恼尘结 无慧者生染
尔时婴儿。复说偈言。
结无有方所 亦非方所得
云何名为生 愿为我演说
尔时世尊。复说偈言。
犹如空中云 可睹无真实
结使生如是 虽见无有实

尔时婴儿。复说偈言。
法同等如如 其生性即如
法若是真实 非如不可得
尔时世尊。复说偈言。
一切非如法 等住于如中
觉了是如已 无过无功德
尔时婴儿。复说偈言。
若不得众生 瞿昙和合谁
先观察法本 从谁有烦恼
尔时世尊。复说偈言。
过去及未来 及与现在世
佛知觉了了 为众生说法
尔时婴儿。复说偈言。
所演说三世 及说我能知
便为是大慢 则为自称誉
尔时世尊。复说偈言。
我不自称誉 亦不轻慢他
如如等显现 是故名如来
尔时婴儿。复说偈言。
如无有可得 非言说相应
非言以言说 是则非是如
尔时世尊。复说偈言。
凡夫随于想 如中生妄想
为断除我想 如来出于世
尔时婴儿。复说偈言。
正觉无出世 善修无生故
于无生法中 佛出不相应
尔时世尊。复说偈言。
无生现有生 佛出世显现
此是世谛说 非是第一义
尔时婴儿。复说偈言。
犹故有二想 世谛第一义
于一乘道中 瞿昙相违说
尔时世尊。复说偈言。

我不道相违 我住不相违
为相违众生 婴儿如是知
尔时婴儿。复说偈言。

悔过于正觉 我上所言说
是佛力持故 我能如是说

尔时世尊。从于衣里出金色臂。起彼婴儿。尔时婴儿。执佛手指从地而起。尔时世尊从彼空处。将是婴儿趣向正陌。是时大众得未曾有。于世尊所倍生敬礼。叹言希有。如來世尊得成如是胜妙之法。乃能令此极苦厄者安住是法。尔时世尊告婴儿言。汝业行尽汝可忆念本造善根。令此大众生希有心。现大神力。尔时婴儿上升虚空。过七多罗树。身放光明。此光遍照三千大千佛之世界。以此光故。释梵护世。及余百千天龙夜叉乾闥婆阿修罗迦楼罗紧那罗摩睺罗伽。见斯光已来诣佛所。到已顶礼佛足。以诸天华散供于佛。供养佛已向佛世尊。作如是言。菩萨光明不可思议。身出光明。普遍照此佛之世界。令诸无量众生得于不思议利。当名此儿不思议光。

尔时释迦牟尼世尊。即可是名。此儿当名不思议光。尔时婴儿不思议光。从空而下住于地已。以佛神力自善根力。其形犹如八岁童子。尔时释提桓因。即以天衣施与婴儿。便语之言。婴儿汝今愍我等故。受此天衣。勿裸形住。尔时不思议光菩萨婴儿。语释提桓因。憍尸迦。菩萨不以衣服为妙。当被法服以为严饰。憍尸迦。菩萨所服汝今善听。憍尸迦。菩提之心是菩萨服乃至道场成满具足一切佛法有惭有愧是菩萨服。调伏成就一切众生置无过中。坚誓庄严是菩萨服。办诸事故。质直无伪是菩萨服。成就断除幻惑伪故。勤加精进是菩萨服。成满具足诸善根故。志欲喜乐是菩萨服。成满一切诸佛法故。除舍憍慢是菩萨服成满一切诸禅定故。欲法闻法是菩萨服。成满般若波罗蜜故。不起智慢是菩萨服。成满具足无著智故。作于利益是菩萨服。悲诸众生具觉知故。舍一切物是菩萨服。成满具足诸相好故。护持净戒是菩萨服。成满愿故。调和忍辱是菩萨服。究竟成满梵音声故。牢强精进无懈退心是菩萨服。成满出过一切事故。得诸禅定解脱三昧是菩萨服。成就满足大通智故。不坏智慧是菩萨服。成就断除一切结使诸见障故。大方便智是菩萨服。成就教化诸众生故。大慈是菩萨服。成就救济诸众生故。大悲是菩萨服。成就生死中无疲厌故。大喜是菩萨服。成就具足于法喜故。大舍是菩萨服。成就舍离爱嗔心故。于诸众生无恼害心是菩萨服。成就不恼于自他故。敷演说法是菩萨服。成就不自誉毁他人故。如说修行是菩萨服。成就断除诸结使故。憍尸迦。应如是知菩萨法服。以法庄严生不裸形。尔时释提桓因。于婴儿所增加恭敬爱念尊重。白言世尊。愍我等故。令是婴儿受取此衣。尔时世尊。告不思议光菩萨婴儿。受帝释衣。于时世

尊。右手取衣授与婴儿。尔时婴儿。右膝着地。以其右手受取是衣。受已便着。尔时世尊。将不思議光菩萨婴儿。于舍卫大城次第乞食。是时大众。男女大小。长者居士。刹利婆罗门。王及辅臣。见不思議光菩萨婴儿。生希有心。亦为见佛礼敬供养悉皆来集。尔时世尊。次第乞食。到不思議光菩萨婴儿所生母舍。尔时不思議光菩萨即入其舍。前至母所。向所生母。而说偈言。

母无有过咎	应当自喜庆
是我本恶业	今生在母腹
母是我福田	哀愍所生恩
母勿生羞耻	速往如来所
母今得大利	腹怀妊我故
如是之功德	往问于导师

尔时不思議光菩萨。语释提桓因。憍尸迦。与我香华衣服所须。欲奉上母。母当以是供养于佛。当发阿耨多罗三藐三菩提心。尔时释提桓因。以天曼陀罗华及以天香天诸衣服。与彼菩萨。尔时不思議光菩萨复向其母。而说偈言。

受此适意华	天妙曼陀罗
妙香及衣服	奉上供释仙
非饮食及宝	能报父母恩
引导向正法	便为供二亲
供二足尊已	发净上道心
我长夜常劝	常数数时勤
其母生喜心	毕竟不生耻
往诣人仙所	礼已在前往
华散如来上	奉华及衣服
佛所种善根	即发菩提心
坚住菩提心	问于释师子
怀妊净众生	愿说是福报
汝以此善业	不生诸难趣
供多亿佛已	当得成为佛

尔时世尊。于舍卫大城。次第乞食已。与不思議光菩萨及诸大众。出王舍大城。向只陀林给孤穷精舍。世尊食已净自澡嗽。而起就座演说正法。尔时憍萨罗国波斯匿王。闻不思議光菩萨婴儿。有大不可思议神通。闻已庄严四种兵众。向只陀林给孤穷精舍。诣世尊所。到已顶礼佛足。却坐一面。波斯匿王白世尊言。大德世尊。不思議光菩萨婴儿。为在何处。闻有如是不可思议神通之力。时佛即示波斯匿王不思議光菩萨婴儿。时王见是不思議光菩萨婴儿。形色

端严殊特于天无所畏惧。具戒定慧以自庄严。如是见已便作是念。种何善根修集何福有是妙身。尔时不思議光婴儿。承佛神力。知憍萨罗国王心之所念。向是大王。而说偈言。

常修慈心净众生	无粗秽恶修正念
摄身口意净梵行	彼有如是净妙身
远离恶者不自造	增长修集无量善
舍离一切恶净讼	彼有如是净妙身
恭敬佛法及圣僧	常恒奉施众妙供
不毁骂他不逼恼	彼有如是净妙身
调弄呵骂及毁訾	于他人所不生是
叹美赞善不说恶	彼有如是净妙身
慳贪嫉妒及憍慢	谛观己行不毁他
彼有如是净妙身	

尔时波斯匿王。白世尊言。是不思議光菩薩嬰兒。成就如是勝妙大法。有何業障。而生于是淫女腹中。捐棄空處。佛告大王。乃往過去九十一劫。爾時有佛。號毗婆尸。出現于世。如來應供正遍覺明行足善逝世間解無上士調御丈夫天人師佛世尊。大王當知。爾時毗婆尸如來法中有二菩薩。一名賢天。二名饒財。賢天菩薩。于無上道得不退轉。得陀羅尼及無礙辯。獲無生忍。有福德威勢。少欲少事。常樂獨處。速得神通。彼時饒財菩薩。習學頭陀。為賢天菩薩而作給使。彼人恒往聚落城邑。多諸事務。是賢天菩薩呵嘖教誨。何故多造是諸事務。而不斷除。數數教呵。彼便生嗔忿心不喜。以忿恚故毀敗身心。敗身心已嗔恚罵言。輕賤淫女兒。私通所生從他人得。不識其父又不識母。況汝當有戒聞定慧。彼嗔罵已復不悔過。又不舍離。結使所纏恒有忿心。嗔賢天菩薩。時賢天菩薩即便舍棄。既舍棄已倍生嗔恚罵詈揚惡。以此不善業行因緣。身壞命終生淫女胎。為彼賢天菩薩所護。不生地獄。淫女生已恒常棄之。為狐狼狗之所啖食。大王。以是緣故。九十一劫常如是死。生生常棄。為多人眾之所罵言。是淫女子。被棄空處狐狼狗食。大王莫疑。何以故。彼時饒財嗔罵菩薩。即是今此不思議光菩薩是也。惡業行盡以善業力。淨于結心悅可佛意。是人惡道悉皆永盡。大王。此不思議光菩薩。已曾值遇六十四億佛。恭敬供養尊重讚嘆。是諸佛所常修梵行勤進求法。此本善力得如是事及神通力。大王。如是黑白之業終不敗亡。是故智者善護身口及以意業。寧舍身命不造惡業。爾時波斯匿王。白言。世尊。彼賢天菩薩。為已得成于一切智。為故修集菩薩行耶。

佛言大王。彼賢天菩薩。今者在彼阿閼佛土修菩薩行。名曰德藏。爾時波

斯匿王。白言世尊。若善男子善女人。常应当亲于善知识近善知识。何以故。世尊。近善知识恭敬围绕听闻善法。闻善法已得于善心。已有善心则修善行造作善业。趣向善处得善知识。得善友故不作诸恶修习诸善。习诸善已自无逼热不逼热他。若有菩萨自护护他能得菩提。若已住道有大势力能有所利。佛言。善哉大王。快说此言。大王。菩萨亲近于善知识。具满一切功德善法。尔时不思議光菩萨白言。世尊。菩萨成就几法。疾得阿耨多罗三藐三菩提。获净法忍。

佛言婴儿。菩萨成就四法。疾得无上正真之道及净法忍。何等四。解因缘忍。远离断常。解无我人众生寿命。解了空寂修行于空。是为四。复有四法。何等四。过去寂灭。未来无来知。现在不住。三世平等。是为四。复有四法。所谓自净。净诸众生。净法。净禅定。是为四。复有四法。谓寂身。寂心。寂道。寂法。是为四。复有四法。谓以法观佛不以色。以离观法不以我。以无为观僧不以众。净于慧眼。是为四。复有四法。所谓满足诸波罗蜜。不舍四摄法。善知方便。说无众生而行大悲。是为四。婴儿。是为菩萨成就四法。疾得阿耨多罗三藐三菩提及深法忍。说是法时。不思議光菩萨。得无生法忍。欢喜踊跃上升虚空高七多罗树。时此三千大千世界六种震动。大光普照天雨众华。百千伎乐不鼓自鸣。

尔时世尊。知不思議光菩萨心已。即便微笑。佛之常法。若微笑时。种种若干百千色光。从面门出。青黄赤白红颇梨色。是光普照遍于无量无边世界。隐蔽魔宫及日月光。断除地狱饿鬼苦已上至梵世。还绕佛三匝从顶相入。尔时大德阿难。从座而起偏袒右肩。右膝着地合掌向佛。说偈问曰。

色相甚微妙	杂好庄严身
圆光善答问	以何因缘笑
上戒行无畏	胜定慧庄严
示坚解脱果	以何因缘笑
忍力及十力	忍勇进难动
乐见示四谛	以何因缘笑
金刚身坚固	那罗延力尽
梵音声悦意	愿演说笑义
梵身天在上	不见如来顶
次第合掌敬	以何因缘笑
树王下降魔	得无垢净道
知诸众生行	愿显何缘笑
转无上法轮	说无常动地

调人天龙等 大德何故笑
照明除闇冥 无垢遍净眼
功德如虚空 以何因缘笑

尔时世尊。告阿难言。汝今见是不思议光菩萨。去地七多罗树住虚空不。阿难白言。已见世尊。阿难是不思议光菩萨。过百千阿僧祇劫。当得作佛。亦号不思议光。出现于世。如来应正遍觉明行足善逝世间解无上士调御丈夫天人师佛世尊。国名净洁。劫名无咎。阿难是净洁佛土甚为清净。如此他化自在诸天宫殿。彼佛寿命二十中劫。大声闻众其数八万。诸菩萨僧三万二千。阿难以何因缘故劫名无咎。阿难。彼时多有百千劫中无佛出世。是不思议光佛。于彼劫中最初成佛。净居诸天欢喜赞叹。此劫无咎。此劫无咎。以有如来出现于世故。是故当名此劫无咎。说是不思议光菩萨时。三万二千众生。发阿耨多罗三藐三菩提心。六万菩萨得无生法忍。五百比丘断诸结漏。心得自在成阿罗汉。尔时佛告阿难。汝受此经持读诵说。于大众中广敷演之。令我正法久住在世。亦多利益未来菩萨。大德阿难。白言。世尊。我已受持。世尊。此经何名。云何受持。佛言阿难。此经名为除净业障。亦名为神力所持不思议光菩萨所说。如是受持。阿难。若善男子善女人。尽其寿命奉诸如来。供养恭敬尊重赞叹。以杂色花鬘如须弥。烧香末香涂香。幢幡宝盖。皆亦如是以用供养。复有善男子善女人。受持于此不思议光所说经法。读诵通利。在大众中广为人说。如说修行。是福多彼。阿难。若欲法供供养如来。欲作大智慧光明者。应当受持读诵此经。佛说是经已。不思议光菩萨。大德阿难。一切大众。人天龙鬼乾闥婆阿修罗等闻佛所说皆大欢喜。